



**ALTI HAIMELIGI
VERSCHNUUFFER**

**Vive, la France!
Honny soit qui mal y pense.**

Weil ich es mir wert bin...
e Wärbe-Slogan vo l'Oréal,
d Fraue freut das kolossal,
tollli Düft, tüüri und fyni Salbe,
dä Laade kennt me au in dr Dalbe.
D Bsitzere, d Mme. Bettencourt,
het Lämbe en famille, zimmlig stuur.
D Tochter het mit dr Muetter Stryt,
d Nestlé mischlet au no mit.
Me darf gar nit dra dängge,
die Alti wurd laufend Gäld verschängge.
Sii losst sich dr Stutz zem Sagg uss logge,
e galante Schnöösel duet kuul zogge,
zig Millione und wärtvollli Sache,
ass är s ganz Joohr ka Blaue mache,
dä wird jo rychn und no viil rycher,
entaignet doch dä Yneschlycher.
Ass d Madame nim wyter ka sündige,
wott d Tochter si grad ganz entmündige.
Weil ich es mir «Woerth» bin,
griegt plötzlich do en andere Sinn.
Dä Minischer, dä armi Sogge,
wird jo bald in dr Kische hogge.
In dr Politigg, à la France,
duet me jetzt mal y pense.
Diggi Schpänden an d Parteye,
d Opposition foht lut afo schreye,
150 Dausig, baar in d Kasse,
dasch öppe nit d Kasse zem Jasse,
drzue kunnt Hinterziehig vo Stüüre,
duet s innepolitisch Füür no schüüre.
Är maint, är syg dr Napoleon,
dr Nico Sarkozy, dä Pausegloon.
Är het doch immer grossi Luscht,
druggt, wo s goht, d Angela an d Bruscht.

Kai Mensch weiss, wie dä Kärli tiggt,
wo alli Roma gen Oschte schiggt.
Dr Gerhard Depardiö dä macht e Knicks,
sait em Sarko numme no Asterix.
Dr Napoleon vo dr Schwyz isch kai Bebbi,
e Walliser isch er, dr Blatter Seppi.
Baidi, das hört me haimlig saage,
wurde Schueh mit hohen Absatz traage.
La grande Nation isch nimm wie friehner,
d Franzose gaggere wien e Schar Hiehner,
si sin unzufriede, schimpfe ganz enorm,
iber die planti neyi Räterereform.
En Uffschrey, gar nit z begriesse,
wenn alli bis 62 schaffe miesse.
Mir wäre drfür, ass d Schwyz wurd sammle,
ass Frankrych nit ganz duet vergammle.
D Först Lady wär doch au non e Trumpf,
wo unsere Nochber könnt zieh uus em Sumpf.
S Topmodel und d Sängere, d Carla Bruni
könt Wärbig mache, wie dr Schorschli Clooney.
What else... oder was denn sunscht...
isch aifach und kai grossi Kunscht.
Mit däne viile Wärb-Millione
könt si d Staatskasse schone,
und, do ka me driber kichere,
so d 35 Schtunde Wuche sichere.
Die ganzi Gschicht, zletschemänd,
het doch non e Häppy Änd,
villicht e Schluss, und e Schööne,
s Bettencourts dien sich wiider versööhne.
Muetter und Tochter, dasch kai Schand,
gän enander wieder d Hand.
Eb das hebt, eb nit Baidi d Mässer wetze,
sich wyter richtig uusenander setze?
Ibrigens, die **Alte Verschnuffer** sin au scho alt,
25 Joohr händle, kittet halt.

D Ladäärne-Uusstellig uff em Minschterplatz und d Waage- und Reggwisyte-Uusstellig bi dr Kasäärne sinn vom Mäntig znacht bis am Mittwuch demorge, 14. bis 16. März. Dert ka men au alli Zeedel und Schnitzelbängg, d Blagedde und dr Rädäbäng kaufe. Wotsch drumme oder pfyffe bi unsere Junge, ob Bueb oder Maitli – bi de Gnepf bisch willkumme!
Uuskunft git: gnepf@verschnuuffer.ch